



ज्वजलपा वा:पौ

JWOJALAPA WEEKLY

दँ ८ ल्या: ०२ (पूर्णडिक १४९) ने. सं. ११३७ दिल्लीगा आमै आइतवा: २०७४ श्रावण ०८ गते आइतवार (Jul- 23, 2017)

मू ८।- पृष्ठ ६

यँया: पुन्हिया इलय् थिमिइ म्ये प्वा: खनीगु जात्रा

बोडेय् जक जुया वयाच्वंगु म्ये प्वा: खनीगु जात्रा ११ दँ लिपा थिमिइ नं याइगु

ज्वजलपा वा:पौ/

मध्यपुर थिमिया अमूर्त सम्पदात आर्थिक नापं सामाजिक कारणं याना लोप जुइगु अवस्थाया दुसा छुं छुं लोप जुइ धुंक्कगु दु। अथे हे थनि भिन्छदँ न्हय:निसँ दिनाच्वंगु म्ये प्वा: खनेगु जात्रा धा:सा थुगुसी याइगु जूगु दु। यँया: पुन्हीया कन्हय् खुन्हु अथे म्ये प्वा: खनेगु जात्रा जुइ थिमिइ। मध्येपुर थिमिया हे बोडेय् दँय् दसं वैशाख २ गते म्ये प्वा: खनेगु याना वयाच्वंगु दु।

आ: वया भिन्छदँ लिपा थिमिइ हे म्ये प्वा: खनेगु सुरु यायेत्यंगु दु। आर्थिक नापं थीथी कारणं संकटय् लानाच्वंगु म्ये प्वा: खनेगु जात्रा थुगुसी जुइगु जुल धका: शनिवा: पत्रकार सम्मेलन याना जानकारी विउगु दु। मध्यपुर थिमि नगरवासी नापं थीथी समाजिक खल: पुच:या ग्वाहालिइ थुगुसी भाद्र २१ गते मध्यपुर थिमि नगरपालिका वडा नं. ५ या २९ दँ दुम्ह विरेन्द्रभक्त गजु श्रेष्ठ म्ये प्वा: खनादी धा:गु दु। जात्रायात व्यवस्थित नापं मर्यादीत रुपं संचालन यायेगु नितिं जात्रा व्यवस्थापन समिति हे गठन या:गु दु।

उगु समितिं जात्रा सम्बन्धी जानकारी बिइगु नितिं पत्रकार सम्मेलन शनिवा: या:गु ख:। पत्रकार सम्मेलनय् समितिया अध्यक्ष चन्द्रकृष्ण श्रेष्ठ परम्परा कथं थिमिइ स्थानीयवासीयात भूतप्रेतं दु:ख बियाच्वंगु अवस्थाया अज्व:गु दु:खं मुक्त जुइगु नितिं थिमिया आराध्यदेवी बालकुमारीया साधना लिपा अथे म्ये प्वा: खनेगु याना वयाच्वंगु ख:। म्ये प्वा:खंम्ह मनुखं भे अर्थात आकाशदीप ज्वना चा:हिलेमा:गु परम्पर

। दु। वइगु यँया पुन्हिया भूवल्य भाद्र २१ गते बहनी ८ बजे थिमिया दिगु त्वा:या दिगु भैरव द्य:या दबुलिइ म्ये प्वा: खनेगु ज्या जुइ धा:गु दु। उकिया नितिं लच्छि न्हय:निसँ हे तयारी यायेमा: धका: धा:गु दु। म्ये प्वा: खनेगु नितिं मुलु दयेकेगु ज्या लच्छि न्हय: हे नक:मितयसं यायेमा: धा:गु दु। अथे म्ये प्वा: खनीगु नतूचा दयेके धुंका: स्ववा: तक शुद्ध तूया चिकनय् थुना तयेमा:।

म्ये प्वा: खनेगु नितिं च्यान्ह न्हय: हे द्य: दुसालेगु धका: बालकुमारी द्य:याथाय् किसिलिं तयेमा:गु हयाउम्ह ग्वंग: बलि बिइमा:गु चलन दु। म्ये प्वा: खनीम्ह मनु न्वमवासे च्वनेमा:गु चलन नं दु। म्ये प्वा: खनीगु हे बहनी बालकुमारी निसँ दिगु भैरव तकया थासय् मत च्याकेमा:। अनं लिपा दिगु भैरव देग:याथाय् जामन थरयाम्ह मनूया उपस्थितिइ भैरवया पुजा यायेमा:। थ्व पुजा लिपा म्ये प्वा: खनीम्ह मनूयात दैव शक्ति प्राप्त जुइगु जनविश्वास दु। अनं लिपा म्ये प्वा: खनीम्हसित निम्हेस्यां ज्वना भैरवया न्हय:नेया दबुलिइ यंकेगु याइ। सलंस:म्ह मनुतयगु न्हय:ने १० इन्च दुगु मुलु अर्थात नतूचा म्येय् प्वा: खनेगु याइ। अनं लिपा भेय ज्वना नगर परिक्रम यायमो:गु चलन दु। अथे नगर परिक्रमा याइगु इलय् म्ये प्वा:खंम्ह मनूया इच्छा कथं परि क्रमा यायेगु ज्या जुइ। अले दक्ले लिपा बालकुमारी देग: वना क:मि नाय:पाखें मुलु लिकायेगु ज्या याइ। मुलु लिकाये धुंका: म्येय् प्वा: गंगुथासय् नास: द्य:या चा तइ। अले उगु मुलु बालकुमारी देग:या थासय् तइ। अथे म्ये प्वा: खनेगु जात्रा क्वचाये धुंका: म्ये प्वा:खंम्ह



मनूयात थ:गु छेंय सगं तकं बिइगु याइ। अले जात्राय सहभागीपिन्त नं भव्य नकेगु याइ। पत्रकार सम्मेलनय् २०५३, २०५९ व २०६३ सालय् याना स्वक्व: तक म्ये प्वा: खने धुंक्कम्ह कृष्ण नानिचा श्रेष्ठ नं उपस्थिति जुयादीगु ख:। आ: मध्यपुर थिमिइ दच्छिया निक्व: म्ये प्वा: खनीगु जात्रा जुइगु जूगु दु। वैशाख २ गते बोडेय् अले यँया पुन्हिया इलय् थिमिइ म्ये प्वा: खनीगु जात्रा याइगु जूगु दु।

किपूया युवातय्त व:गु अवसर

- नेवा: एफ एमया ज्याभूव: न्ह्याकामि जुइत
- नेवा: एफ एम १०६ दशमलब ६ या प्राविधिक जुइत
- बजार व्यवस्थापक जुइत

स्वापू तयादिसँ

ज्वजलपा वा:पौ व कीर्तिपुर सन्देश

साप्ताहिक फोन नं. ४३३३००७

९८४१४०१०७७ व ९८४१७५२५८३





ज्वजलपा वा:पौ

सल्लाहकार
श्रीकृष्ण महर्जन
प्रकाशक:

नजरराम महर्जन

सम्पादक

श्रीकृष्ण तण्डुकार

ले-आउट:

ज्वजलपा डेस्कटप

संवाददाता

रामभोला महर्जन, निरजमान सिंह
थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४९४०९०७७

ई-मेल : jwojalapaweb@gmail.com

सम्पादकिय

थांबहा:या ग्वा: पुखूया संरक्षणया सवाल

गोपालवंशीत नाप स्वापू दुगु किपू खः अले किपूया इतिहास गोपालवंशीत नाप हे स्वानाच्वंगु दु धइगु उदाहरण जुयाच्वंगु ग्वा:पुखूया बारे बहसया विषय जूगु दु । विशेष याना समाजिक संजालयात ह्यालादीपि युवातयसं ग्वा: पुखूया बारे खास हे मसिउगु अवस्था खःसा आः सः सिउपिन्सं धायेवं उकियात कया चिउताः प्वंकाहःगु दु । न्हापा थांबहाः त्वालय ग्वा: पुखू दुगु खः । अले व हे ग्वा: पुखुलिइ दैय दसं गथांमुगः खुन्हु विशेष कथं पुजा यायेमाःगु चलन दुगु खः । अले पुजा धुंकाः जक किपूया त्वाः त्वालय थनातःपि गथांमुगः वाये यंकेमाःगु चलन दुगु खः ।

थांबहाः त्वालय दुगु उगु ग्वा: पुखू ल्हाना ह्वःगु तःदै दये धुंकूगु दु । अथे ग्वा: पुखू ल्हाका ह्वःगु धइगु हे किपूमित ग्वापालवंशी नाप स्वानाच्वंगु दु धइगु इतिहासयात छगू कथं हाचां गायेगु खः । किपुलिइ गोपालवंशीया नामं ग्वा: पुखू दु धायेगु हे किपुलिइ गोपालवंशीया इलनिसें हे बसोवास जुयाच्वंगु थाय् खः धकाः प्रमाणित जुइ । उकिं व ग्वा: पुखूया बारे न्हू जनप्रतिनिधितयसं चासो तयेमाः धकाः मनूतयसं धयाहःगु दु ।

किपूयात पर्यटकीय क्षेत्रया रूपय विकास यायेगु खःसा, किपूया इतिहासयात ल्यंकाः तयेगु खःसा ग्वा: पुखू नं छगू महत्वपूर्णगु सम्पदा खः धकाः थुइका उकियात ल्यंका तयेमाःगु आवश्यकता दु । उकिं किपू नगरपालिकाया न्हू जनप्रतिनिधिपि नापं संस्कृतिप्रेमि व सम्पदाप्रेमिपिन्सं थुगु विषययात कया दुग्यंक बहस यायेमाःगु आवश्यकता जूगु दु ।

गजल शौरभ शाक्यया

गजल-३८



छंगु नुगः मिखा चायेका स्व जितः
छंके दुगु मतिनां यःयेका स्व जितः ।
धात्यूँ जि धइम्ह म्हसिकेगु खःसा
सर्गतय बखूँथें व्वयेका स्व जितः ।
दुःखय सुखय गुलि थःजु लना स्व
लसय हंका म्ये हायेका स्व जितः ।
जः वयेकेत छप्वाःमतः कु मगाला
छंगु यःया जलं गायेका स्व जितः ।
छ वइ लैय मिखा लायाचवना जि
छं जीवनय निभाः त्वयेका स्व जितः ।

गैर न्यायीक सतक विस्तारः नेवाः सरोकार



श्रीकृष्ण महर्जन

गैर न्यायीक कथं पंचायतकालया कानुनया अधारय् संघीय लोकतान्त्रिक गणतन्त्र वये धुंकूगु अवस्थाय नं सतक विस्तार यायेगु नामय जनतायात दुःख बियाच्वंगु दु । सतक विस्तार धइगु विकास खः धकाः मनूतयूत छगू कथं भ्रमय लाका थःपिनिगु योजना न्ह्याकेगु ज्या यानाच्वंगु अवस्था खः ।

सतक विस्तारया सवालय सतकं लिक्क चर्चिपि गुपिनिगु छें वुँ लाइगु अवस्था दु इमिसं विरोध याना सतकय क्वहां वयाच्वंगु जूसां ल्यूने चर्चिपि मनूतयूत ग्वाका सतक विस्तार विरोध याइपिन्सं छगू कथं विरोध याकेगु ज्या यानाच्वंगु दु । उलि जक मखु थीथी राजनीतिक पार्टीया सांसद जुयाचर्चिपि स्वनिगःया आदिवासी नेवाःतयगु तकं सतक विस्तारया नामय थःपिनिगु जग्गा छें लानाच्वंगु जूसां नं मौन जुयाच्वंगु दु । बास्तवय जनताया जग्गा छें सतक विस्तारया नामय कायेगु खःसा दक्ले न्हापां सरकारं किताकात यायेमाःगु अले मुआब्जा विइमाःगु कानुनी प्रावधान दुगु अवस्थाय नं कानुन पालना मयासे याकःति कथं गैर न्यायीक कथं सतक विस्तार यानाच्वन धकाः पीडित सांसदतयसं मस्युगु धाःसा अवश्य नं मखु । सांसद जुया नं थःपिन्सं गैर न्यायीक ज्याया विरोध याये मफुगु अले जनस्तरं याःगु आन्दोलनय सतकय क्वहां वये मफुगुया व मवयाच्वंगु छगू अर्थपूर्ण खः । राजनीतिक पार्टीया सांसद जूगु अले पार्टीपाखें अथे आन्दोलनय मवनेत निर्देशन बियातःगुलिं हे थःत दुःख जूसां नं मौन च्वनाच्वंगु खयेमाः धकाः गैर न्यायीक सतक पीडित संघर्षय क्रियाशिल जुयाचर्चिपि व नेतृत्व यानादीपिन्सं थुइकाच्वंगु दु । बास्तवय स्वनिगलय सतक विस्तार याइगु ज्यापाखें दक्ले अप्पः स्वनिगःया आदिवासी नेवाःत हे प्रभावित जुइगु अवस्था दु । स्वनिगलय सतक विस्तारया भूवलय आः तकया दुने साढे ५ सय किलो मिटर मध्ये ३ सय किलो मिटर सतक विस्तार यायेगु ज्या क्वचाये धुंकल धकाः दावी यानाच्वंगु दुसा आः

हाकनं ५ सय किलो मिटर सतक विस्तार यायेगु धकाः तकं सतक विस्तारया नितिं ज्या यानाचर्चिपिन्सं धायेगु यानाच्वंगु दु । इमिसं हे धाः कथं ३ सय किलो मिटर तक सतक विस्तारया ज्या क्वचाये धुंकूगु अवस्था जूसां स्वनिगःया ट्रफिक जामय खास हे बोलाःगु लिच्वः लाःगु मदु । न्हिया न्हियं सतकय उलि हे जाम जुयाच्वंगु अवस्था दु । स्वनिगलय सवारी साधन वइगुयात गबले तक नियन्त्रण याइमखु अबले तक न्ह्याक्व सतक दयेकूसां गाइमखु धकाः अपुक हे धायेछिं । अथे हे बाहिरी चक्रपथ निर्माणया खं नं वयाच्वंगु दु । करिव १२ सय किलोमिटर सतक दयेकीगु अवस्थाय १ लाख रोपनी काइगु अले सतकय जक हे स्वनिगःया गुलि नं जग्गा दु उकिइ १० प्रतिशत जग्गा ला सतकय हे लाइगु अवस्था दु । अथे बाहिरी चक्रपथ दयेकीगु अवस्थाय नं सवारी साधन अनियन्त्रीत कथं स्वनिगलय दुकया तल धाःसा छुं दैया दुने हे हाकनं ट्रफिक जामया समस्या अज्वःगु हे कथं जुइ । थौं कन्हय धू व्वया माक्स तया मनूत लैय जुइमाः थें हे कन्हय वना स्वनिगलय सासः ल्हायेगु नितिं अक्सिजन हे मदया अक्सिजन हे मनूतयसं ज्वना जुइमालीगु अवस्था मवइ धकाः तकं धायेमफु ।

थुगु कथंया स्वनिगलय सतक विस्तार निसं बाहिरी चक्रपथ निर्माणया सवाल दक्ले अप्पः प्रभावित जुइपि नेवाःत हे खः । सतक विस्तारया भूवलय हाइवे दुथाय ५० मिटर अले मेमेगु थासय २२ मिटर कायम यायेगु कथंया योजना दयेका सतक विस्तार प्राधिकरणं ज्या यानाच्वंगु खने दु । अथे सतक विस्तार याइगु अवस्थाय मनूतयगु छें ला लाइगु अले नेवाःत ला विस्थापित जुइगु हे जुल अथे विस्थापित नाप नापं नेवाःतयगु पहिचानय तकं तःधंगु लिच्वः लाइगु अले नेवाः भूमि तकं धाये मफइगु अवस्था वइगु खतरा भन भन अप्वया वःगु दु ।

आःसतक विस्तार यायेगु कुतः यानाच्वंगु लागा कालिमाटीनिसं थक्कः तकया लागाय स्वल धाःसा कलकमाई (कलंघः), गुर्ज हिति, थक्वाया लिच्छिवीकालिन कुमारीया थाय, ससुद्य, हनुमान देगः, सतः लगायत् थ्यमथ्यं वागू दर्जनसिवें अप्पः महत्वपूर्ण सम्पदा समाप्त जुइगु अवस्था दु । अथे हे तोखाया अवस्था स्वल धाःसा अन दक्षिण एसियाय हे दक्ले तःधिकःगु थ्यमथ्यं साढे ५ फिटया

भिमसेनया मूर्ति, न्हयगूगु सताब्दीया गणेद्यः, मू ध्वाखा, नारायण पुखू, मयजु हिति, जरु हिति, नारां देगः, हासा घः, गाःहिति, गणेश पुखू, भगवान घः नापं छगू दर्जनं मल्याक महत्वपूर्णगु सम्पदात समाप्त जुइगु अवस्था दु ।

तोखाया जात्रा नाप स्वापू दुगु घः व पुखू तकं लाइगु जूगुलिं तोखाया संस्कृतिइ तकं तःधंगु लिच्वः लाइगु अवस्था दु । थुगु ल्याखं स्वल धाःसा तोखाया ५० प्रतिशत सम्पदा समाप्त जुइ । अथे हे सतक विस्तारं यल जिल्ला दुनेया नेवाः वस्ती बाडेगामय ला ९० प्रतिशत सम्पदा हे समाप्त जुइगु अवस्था दु । जवय ११ खवय ११ याना २२ मिटर सतक तव्या याइगु अवस्थाय सलंसः दै न्हयःनिसंया सम्पदा नष्ट जुइगु अवस्था दु । १७ सय बर्ष न्हयःया बुधवाः घः व देगः, बुभोल हिति, बुभोल तुं, बुभोल फल्वा, गणेद्यःया देगः, वा पुखू, बहाः फल्वा, सतः, चीबाहाः, भिमसेन देगः, देय पुखू, उमामहेश्वर देगः, नासः घः, थुधियप भवननिसं थीथी कथंया निगू दर्जनं मल्याक सम्पदा समाप्त जुइगु अवस्था दु । उकिं बाडेगामय सम्पदा समाप्त याये दइमखु धकाः तःपाः जुइक बोर्ड हे तिका खबरदारी यायेगु ज्या तकं याःगु दु ।

थुगु कथं सतक विस्तारया भूवलय सम्पदा समाप्त जुइगु अवस्था दुगु धइगु नेवाःतयगु संस्कृति, सम्पदा नापं नेवाः पहिचान विरुद्धया हे पलाः खः धकाः थुइकेमाः । थौं तोखा, बाडेगां, थक्क नापं मेमेगु लागाय सम्पदा गैर न्यायीक कथं सतक विस्तारया नमाय समाप्त यात धाःसा कन्हय वना मेमेगु नेवाः वस्तीया सम्पदात नं समाप्त याइमखु धकाः धाये थाकुइ । उकिं सतक विस्तारं मनूतयूत जक मखु समग्र नेवाः समाजयात हे नेवाः सभ्यतायात हे तःधंगु लिच्वः लाकीगु अवस्था दु धकाः थुइकेमाः । उकिं नेवाः संस्कृति सम्पदाय यायेत्यंगु प्रहारयात सकल नेवाःतयूत याःगु प्रहार धकाः थुइकाः आः गैर न्यायीक कथं सतक विस्तार याना नेवाः संस्कृति समाप्त याये दइमखु धकाः मंकाः कथं सः थ्वयेकेगु ज्या यायेमाःगु अवस्था दु । थ्व इलय सतक विस्तारया आन्दोलनय नेतृत्व यानादीपि नापं नेवाः ख्यःया न्हयलुवातयसं नं नेवाःतयूत विस्थापित यायेगु नापनापं सम्पदा नं समाप्त यायेत्यन धकाः थुइकेगु व कनेगु नापं उकिया विरुद्ध सः तया वनेगु कथंया सरोकार क्यना वनेमाःगु थौया आवश्यकता जुया विउगु दु ।



ज्वजलपा वा:पौ

समुदाय व प्रहरीया मंका: कुतलं न्ह्यानाच्वंगु सामुदायिक सेवा केन्द्रया दँ मुँज्या वंगु विहिवा: किपूया हिलसाइड होटलय् तःजिक हन ।

सामुदायिक सेवा केन्द्र किपूया नाय: रविन्द्र बहादुर प्रधानया सभानायोसुइ जूगु उगु ज्याभवःया मूपाहाँ किपू नगर पालिकाया मेयर रमेश महर्जन व कालिञ्चोक भगवती गणया प्रमुख एसपी श्यामराज कुँवरं भिंतुना न्वचू पालंपा: त्वारवालय् मत च्याका: उलेज्या यानादीगु खः ।

मेपिं पाहाँपिं किपू नगर पालिकाया उपमेयर सरस्वती खड्का, महानगरीय प्रहरी वृत किपूया डिएसपी तुल बहादुर कार्की, प्रहरी वृत किपूया पुलांम्ह डिएसपी डा. मेखबहादुर खत्री अले त्रि.वि.या पुलांम्ह उपकुलपति प्रा.डा. हिराबहादुर महर्जन भ्यायादीगु खः । अथे हे किपू नगरपालिकाया नवनिर्वाचित भिगु १० वडाया वडाध्यक्षपिं न पाहाँकथं भ्यायादीगु खः । केन्द्रया न्वकू विजय महर्जन लसकुस न्वचू बियादीगु खः । केन्द्रया नाय: रविन्द्रबहादुर प्रधानं ज्याभवःया आजु व सामुदायिक केन्द्र कीर्तिपुरया म्हसीका न्ह्यव्वयादीगु उगु ज्याभवलय

महानगरीय प्रहरी वृत किपूया पुलांम्ह प्रमुख डिएसपी डा. मेखबहादुर खत्री व कालिञ्चोक भगवती गणया प्रमुख श्यामराज कुँवरं भिंतुना न्वचू बियादीगु खः ।

महानगरीय प्रहरी वृत किपूया पुलांम्ह प्रमुख डिएसपी डा. मेखबहादुर खत्रीया हे कुतलं वंगु २०७३ साल श्रावण ५ गते सामुदायिक सेवा केन्द्र कीर्तिपुर या पलिस्था जूगु खः ।

ज्याभवलय विशेषपाहाँ किपू नगरपालिकाया उपमेयर सरस्वती खड्का थःगु नुगःखँ तयेगु भवलय सामुदायिक सेवा केन्द्र किपू नगरया थीथी सामाजिक पक्षयात कःघाना याइगु विकासया ज्याभवःयात थः व किपू नगरपालिकां ग्वाहालि यायेगु बचं बियादीगु खःसा सामुदायिक सेवा केन्द्र न्ह्याकेत्यंगु मिसा केन्द्रीत ज्याभवः 'मिसा सेल्फ डिफेन्स' मिसापिन्सं आत्मरक्षा यायेगु ज्याभवलय स्वयम थः न सहभागी जुइगु खँ कनादिल ।

थगुने हे किपूली सिसिटिभि तयेगु खँ जूसां अभूतक मतःगु व लिपा छु योजना दु धका:

अन चित्त बिया: न्यंगु न्ह्यसःया लिस: विइगु भवलय मूपाहाँ किपू नगरपालिकाया मेयर रमेश महर्जनं किपू विकासया नितिं थीथी क्षेत्रय् फ्याःगु बजेट रकमया जानकारी बियादिसें आ: तत्कालया नितिं किपूया ९ वडाय् च्वंगु पांगा वनेगु दुपा:निसें बाहिगांया कीर्तिपुर माध्यमिक विद्यालय परिसरतक उगु लागया थीथी व्यापारिक संघसंस्थाया ग्वाहालिं सीसी क्यामेरा जडान यायेगु खँया जानकारी बियादीगु खः ।

मेयर महर्जनं नं थः स्वयम जुडो कासालिसे सम्बन्धित मनु जूगुलिं सामुदायिक सेवा केन्द्र कीर्तिपुर न्ह्याकेत्यंगु मिसापिन्त आत्मरक्षा यायेगु ज्याभवलय थःपिन्त ल्वःममकेत व उगु ज्याभवलय थःम्हं व नगरपालिकां फूगु ग्वाहालि यायेगु बचं विचादिल । मेयर महर्जनं टियु नं निर्माण याःगु तांल्वानिसें ल्याव स्कूलतकया न्हूगु लँपु छ्वा: मदुवं हे स्यंगुयात कया: सामाजिक संजालय थःत थीथी कथंया लाञ्छना ब्यूगु खँ न्ह्यथनादिसें उगु सतक निर्माण ज्याभवलय किपू नगरपालिकाया छु सरोकार



व ल्हा: मदूगु जानकारी बियादिल । वय्कलं आ: किपू नगर दुने छुं नं संरचनात निर्माण यायेवलय स्थानीय तहया सरकारया स्वीकृति बिना: दयेके मदइगु व स्थानीय तहया सरकारं मसीक च्वय् पाखें स्वीकृत याना: ज्या याये मदइगु कानून निर्माण यायेत्यनागु खँया जानकारी नं बियादीगु दु । उगु ज्याभवलय सामुदायिक सेवा केन्द्र कीर्तिपुरा शिक्षा समिति कजि लाक्पा शेर्पा सुभाय देछानादीगु खःसा केन्द्रया

नाय: व ज्याभवःया सभापति रविन्द्रबहादुर प्रधानं ज्याभवः व्वाचायेकादीगु खः । ज्याभवलय ग्वाहालि यानादीपिं व्यक्ति व संघ संस्थायात सम्मान यासें प्रशंसा च्वय् पाखें स्वीकृत याना: ज्या महर्जन, उपमेयर सरस्वती खड्कापिन्सं लःल्हानादीगु खःसा केन्द्रपाखें मेयर रमेश महर्जनायत मतिनाया चिं कथं अदालतय् छयलीगु मुगःचा केन्द्रया नाय: रविन्द्रबहादुर प्रधानं

लःल्हानादीगु खः । उगु ज्याभवलय किपू नगरपालिकाया नवनिर्वाचित मेयर, उपमेयर व वडाध्यक्षपिंलिसें वडा दुजःपिन्त हनेगु ज्या नं याःगु खः ।

निगू चरण कथं न्ह्याःगु उगु ज्याभवलय न्हापांगु चरणया ज्याभवः केन्द्रया छ्याञ्जे वीरेन्द्र विविशा शाक्य न्ह्याकादीगु खःसा निगूगु चरणया ज्याभवः केन्द्रया ल्यूछ्याञ्जे जुजुभाई महर्जन न्ह्याकादीगु खः ।

**ज्वजलपा वा:पौ /**

शैक्षिक गुठी अन्तर्गत चलय जुयाच्वंगु पांगा मा.वि. एसईई २०७३ या परीक्षाय् उत्तीर्ण जूपिं थः विद्यार्थीपिन्त छगू ज्याभवःया दथुई भिन्तुना कालबिल यात । वंगु असार ३१ गते थःगु हे हलय् जूगु उगु ज्याभवःया सभानायो विद्यालयया अध्यक्ष प्रा.डा. नन्दबहादुर महर्जन खःसा मूपाहाँ कीर्तिपुर नगरपालिकाया मेयर रमेश महर्जनं त्वारवालय् मत च्याका उलेज्या यानादीगु खः ।

मेपिं पाहाँपिं उपमेयर सरस्वती खड्का, वडा नां दया वडाध्यक्ष विनोद महर्जन, पीईपीया अध्यक्ष माधवलाल महर्जन, प्रा.डा. रामकृष्ण महर्जन, प्रा.डा. श्यामकृष्ण महर्जन,

जनसेवा मा.वि.या प्राचार्य नन्दकुमारी महर्जन लिसें विद्यालय संचालक समितिया दुजःपिं नं दुगु खः ।

भिगु तगिलय् ब्वनाच्वंम्ह रेजिना महर्जनं न्ह्याइपुक उद्घोषण याना चलय याःगु उगु ज्याभवलय प्रिन्सिपल श्याम सुन्दर महर्जनं लसकुस न्वचु विइगु भवलय २०७२ सालया तःभुखाचं थःगु स्कूल तसकं स्यंका: ब्यूगु इलय् पीईपीया संरक्षक जर्मन नागरिक गिलफ्रेड जर्फनया ग्वाहालिं थ्व टीएलसीया कोथा दयका बिल । छगू भवन रेक्टोफिटिंग याना स्कूल चलय यायेत ग्वाहालि बिल । यदि उलि ग्वाहालि मब्युसा जूसा थौं स्कूल चलय यायेफइगु अवस्था हे दइमखु धयादिल । उकिया निति

पीईपीया संरक्षक, अध्यक्ष नापं दुजःपिन्त सुभाय बियादिल ।

एसईई उत्तीर्ण विद्यार्थीपिन्त थीथी पाहाँपिन्सं खादा, अगिर नापां मतिनाया चिं लःल्हाना अभिनन्दन याःगु खः ।

एसईई पासजूपिं विद्यार्थीपिनिपाखें स्नेहा दवाडी थःगु नुगः खँ तयेगु भवलय थःपिनिगु सफलताया जस स्कूलया शिक्षकपिं, अभिभावकपिं व व्यवस्थापन समितिया तःधंगु ल्हा:दुगु धयादिल । थ्व स्कूलया शिक्षक शिक्षिकापिन्सं थःपिन्त थःहे मस्तथें माया मतिनायाःगु जिन्दगीया गुगुं इलय् नं ल्वमके फइमखु धयादिल ।

अथेहे भिगु तगिलय ब्वनाच्वंम्ह विद्यार्थी विवेक गौतमं पास जूपिन्त भिन्तुना बिसें

पाँगा माध्यामिक विद्यालयसं अभिनन्दन ज्याभवः

थःपिन्सं नं फयांफतले बांलाका वनेगु विचा: प्वंका: दिल ।

मूपाहाँ नगरप्रमुख रमेश महर्जनं थःगु खँ तयगु भवलय शैक्षिक गुथि अन्तर्गत चलय जुयाच्वंगु पाँगा मा.वि. नाफा कमाय् यायेगु स्वया: विद्यार्थीपिनिगु गुणस्तरयात ध्यान बिया: आख: व्बंकेगु यानाच्वंगुलिं सुभाय बियादिल ।

वय्कलं पासजूपिं विद्यार्थीपिन्त मेपिनिगु लहैलहैलय वनां उच्च शिक्षा ब्वनेगु विषय छनौट यायेमखु । थःत छु विषय यः वहे ल्यया ब्वनेगु । छुं नं विषय मज्यूगु धइगु मदु । न्ह्यागु विषय ब्वंसां व विषयलय पारंगत जुइगु सल्लाह बियादिल । किपूली शिक्षा क्षेत्र सुधारया नितिं नगरपालिकां निगू करोड धेवा फ्यानागु खँ कनादिल । अथेहे किपूया मू समस्या जुयाच्वंगु त्वनेगु लःया निति १९ करोड धेवा फ्यानागु खँ नं कनादिल । आ: याकनं हे हितिई लः वइगु आशा प्वंका दिल ।क

पीईपीया अध्यक्ष माधवलाल महर्जनं पीईपी शिक्षा क्षेत्रय् ग्वाहालि याना वयाच्वंगु खँ कनादिल । थौकन्हे थीथी स्कूलय यानां ७५ म्ह विद्यार्थीपिन्त आख: ब्वंका तयागु खँ कनादिसें, पाँगा मा.वि.थें शैक्षिक गुथि अन्तर्गत संचालित नाफारहित शिक्षा बियाच्वंगु विद्यालय जुया: भुखाचं स्यंकूगु इलय् थःपिनिगु संस्था अप्व: मखुसां स्कूल चलय याये ज्याछिंक छें दयका: ग्वाहालि यानागु खँ कनादिल ।

प्रा.डा.रामकृष्ण महर्जनं थःगु नुगः खँ तयेगु भवलय धयादिल एसईई पास जुल । शिक्षाया वास्तविकता आ:तिनि सुरु जुइ । थन स्कूलय् थें कलेजय शिक्षकपिन्सं उलि वास्ता याईमखु, उकिं थःगु पढाईया निति थःम्हं हे मेहनत यायेमाली । कलेजया पढाई नं भविष्य निर्धारण याइ धयादिल ।

पाँगा मा.वि.या निर्देशक रमेश मान महर्जनं सुभाय न्वचू

विइगु भवलय् पीईपीया संरक्षक, अध्यक्ष लगायत ज्यासना पुचःयात नापं सुभाय बियादिल । भुखाचं थःगु स्कूल बांमलाक स्यंका: बिल । ग्वाहालिया नितिं भुकम्प पुनः निर्माण समिति, जिल्ला शिक्षा कार्यालय फुक्क थासय् स्वापू तया: नं सुनां हे वास्ता मयाना: थः निराशथें जुयाच्वनागु इलय् पीईपीया नाय: माधवलाल श्रेष्ठया कुतलं ग्वाहालि दुगुलिं थौं थ्व अवस्थाय् स्कूल ध्यनाच्वंगु खँ कनादिल ।

अथेहे अभिभावक, शिक्षक, व्यवस्थापन सकसियागु कुतलं थौं थ्व नतिजा कायेफुगु खः धयादिसें सकसितनं सुभाय बियादिल । ज्याभवःया दथुई दथुई विद्यार्थीपिन्सं न्ह्याइपुक सांस्कृतिक ज्याभवःनं न्ह्यव्वःगु खः ।

सभानायो प्रा.डा.नन्दबहादुर महर्जन पासजूपिं विद्यार्थीपिन्त उज्ज्वल भविष्यया कामना याना भिन्तुना बियादिल ।

जनसेवा मा.वि.या ७० औं जन्मदिन



ज्वजलपा: वा:पौ

वंगु साउन ३ गते मंगलवा: पाँगा इच्छालयचवंगु जनसेवा मा.वि.पलस्थायी ७० औं जन्मदिन हन। उगु हे लसताय अभिभावक एसईई पासजूपिं मस्तयत भिन्तुना नापं थोथी सिरपा: नं इनेगु यात।

मूपाहाँ किपू नगरपालिकाया मेयर रमेश महर्जन स्कुललय साईन्स ल्याव उलेज्या यानां, इच्छालयनिसं पाँगा पार्टी भेन्नु धाखासी तक विद्यार्थीतसं मार्च पास याना मूपाहाँ व पाहाँ पित्त वनां यंकूगु ख:। पाँगा पार्टी भेन्नुलय विद्यालय व्यवस्थापन समितिया नाय: माधवलाल महर्जनया सभानायोसुइ ज्याभव: जुल। उगु ज्याभवलय मूपाहाँ मेयर रमेश महर्जन त्वारवालय मत च्याका ज्याभव:या उलेज्या यानादिल। मेपिं पाहापिं उपमेयर सरस्वती खड्का, भिगु १० वडाया वडाध्यक्षपिं, पुलांमह राज्यमन्त्री दिलीप महर्जन, विद्यालय निरिक्षक, श्रोत व्यक्ति, नापं थोथी गण्यमाण्य व्यक्तिपिं दुगु ख:। नगर प्रमुख, उपप्रमुख व वडाध्यक्षपिं नापं खुल्ला युनिभर्सिटीया उपकुलपति प्रा.डा. लेखनाथ शर्मायात समाजसेवी इन्द्रमान महर्जन व टिकाराम महर्जन सम्मान यानादिल। लसकुस न्वचू प्रिन्सपल

नन्दकुमारी महर्जन स्कुलया गतिविधि बारे चिहाकयूक म्हासिका बिया: सकसित लसकुस यानादिल। अनं लिपा कक्षा १ निसं कक्षा ५ तक न्हाप, ल्यू व लियां ल्यू लापिं विद्यार्थीपित्त विश्वनाथ पुरस्कार पदमलाल महर्जन व कमला महर्जन इनादिल। अथेहे कक्षा ६ निसं १० कक्षातक न्हाप, ल्यू व लियां ल्यू लापिं विद्यार्थीपित्त प्रज्ञा सिरपा माधवलाल महर्जन इना: दिल।

एसईईलय विज्ञान विषयलय उत्कृष्ट ल्या:पिं छात्र/छात्रा मध्ये जि.पि.ए.४ हयत ता:ला:पिं सौर व महर्जन व निरुता कार्कीयात ई.पदमलाल महर्जन १५००/१५०० धेवा सिरपा: बिल।

अथेहे पदमलाल महर्जन लिफ-लोटस एजुकेशन एचिभमेन्ट फाउण्डेशन पाखे निरुता कार्की जिपिए ३.६ व न्यूज्ञान वहादुर विष्ट जिपिए ३.२, प्राविधिक पाखे मेनुका चन्द जिपिए ३.९२ व छात्र मिलन मोक्तान जिपिए ३.८० यात म्हाति २५०० धेवा सिरपा बिल।

थोथी सिरपा: इनेगु भवलय विद्यालयलय नियमितजूपिं शिक्षकपित्त हना:पौ व सिरपा पुलांमह शिक्षामन्त्री दिलिप महर्जन रुपेश महर्जन, अविन महर्जन, शिवराम श्रेष्ठ व मन्दिरा गुरुङयात

देखना दिल।अथेहे तहगत उत्कृष्ट शिक्षक सिरपा पुर्व प्रार्थमिक सृजना आचार्य, प्रार्थमिक रुपा महर्जन, नि.मा.वि. शिवराम श्रेष्ठ, मा.वि.अविन महर्जनलाई बुद्धिवहादुर महर्जन देखना दिल। प्राविधिक पाखे एसईई पासजूपिं विद्यार्थीपित्त मेयर रमेश महर्जन व ई.दुर्कमान महर्जन ओजिटी पारि श्रमिक ४२ म्ह विद्यार्थीपित्त म्हाति ४ प्यद्र: प्यद्र: इनादिल। अथेहे स्कुलय २५ दै ज्यायाये धुंकूपिं १३ म्ह शिक्षक व ३स्वम्ह कर्मचारीपित्त वि.व्य.स.या नायो माधवलाल महर्जन दीर्घसेवा पदक नापं हना: पौ ल:ल्हाना दिल। उत्कृष्ट शिक्षक पुरस्कार शिक्षक शिवराम महर्जनयात माधवलाल महर्जन देखना दिल। मूपाहाँ मेयर रमेश महर्जन थ:गु न्वचु तयेगु भवलय जनसेवा मा.वि. सामुदायिक विद्यालय जूसां नीजि स्कुलस्वया छुं हे कम मजू, उलिमछि विद्यार्थीपिं दुगु, इलेक्ट्रिकल इन्जिनियरिंगया पढाई जूगु व नेपाल सरकार नमूना विद्यालयया मान्यता ब्यूगु धइगु किपूया हे गौरव ख: धयादिल। वयकलं थुगुसी हानं किपूया हे सामुदायिक विद्यालय मङ्गल मा.वि.यात नं नमूना विद्यालयया मान्यता बिउगु भन गौरवया खं ख: धयादिल।



कीर्तिपुर मा.वि.या भिन्तुना ज्याभव:

ज्वजलपा: वा:पौ

किपूया बाहिरीगांमय चवंगु कीर्तिपुर माध्यमिक विद्यालयनं एसईई २०७३य पासजूपिं विद्यार्थीपित्त भिन्तुना नापं विदाईया ज्याभव: या:गु दु। थ्वहे साउन ७ गते सनिवा: विद्यालय व्यवस्थापन समितिया नाय: रेणुलाल महर्जनया नाय:सुइ जूगु भिन्तुना नापं विदाई ज्याभव:या मूपाहाँ वडा नं.९या वडाध्यक्ष गंगाराम महर्जन, विशेष पाहाँ विद्यालय निरिक्षक मोतिराज खनाल नापं सल्लाहकार प्रा.डा. रामकृष्ण महर्जन, समाजसेवी हिरावहादुर महर्जन, नजरराम महर्जन नापं विद्यालय व्यवस्थापन समितिया दुज:पिं दुगु ख:। लसकुस न्वचु प्रधानाध्यापक बन्नी खनाल बियादीगु ख:। छगु इलय किपूया नांजा:गु विद्यालय ख:सां लिपांगु इलय वया: तसकं बांमलाय धुंकूगु स्कुल थ:वयधुंका: बांलाना वयाचवंगु कना:दिसं थुगुसि बांला:गु नतिजा विइत ता:ला:गु खं कनादिल। थुगुसी सच्छिम्ह मल्याक विद्यार्थी भर्ना जूगु लसताया खं ख: धयादिल। सकसियागु ग्वाहालि दत धा:सा की.मा.वि.यात नं नमूना विद्यालय दयेके फैगु खं कनादिल। विद्यालय निरिक्षक मोतिराज खनाल माध्यमिक तहतकया स्कुल स्थानीय निकायया जिम्मा धाल। तर नियम दयेकेमफुगुलिं अजतक फुककं च्वं हे नियन्त्रण याना तलतिनि धयादिल।

प्रा.डा. रामकृष्ण महर्जन विद्यालयस्तरय यग्गु स्तरय पास जूसां छुं मतलव मदु। कलेज जीवनय बांलाक ब्वने फयकेमाल। ब्वनांवं लिसे भविष्यया लै कोरय जुयावनी। वयकलं धयादिल, “जि एसएलसी पास यानावलय जि प्रा.डा. जुइधका: कल्पना तक मयानागु थौं जुल। उकिं स्कुल लिपाया शिक्षायात महत्व बिइमा:। थ:त छु विषय अ:पु वहे ब्वना वनेमा।” मूपाहाँ गंगाराम महर्जन किपू नगरपालिकाय दुनेदुगु भिगु सामुदायिक विद्यालययात म्हाति २० नीग: कम्प्युटर बिइगु, हरेक स्कुलयात वाईफाई फ्री यायेगु किपू नगरपालिकाया बजेटय दुथ्याय धुंकुगुलिं याकनं हे व सुविधा थन नं थ्यनि धयादिल। उगु ज्याभवलय कक्षा १ निसं १० तकया उत्कृष्ट विद्यार्थीपित्त मूपाहाँ पाहापिन्सं सिन्ह तिका:, खादा क्वखायका सिरपा: इनाबिल। अथेहे २०४ औं भानुभक्त जयन्तिया लसताय जूगु सदानात्मक धेधेवल्लाकासाय न्हाप, ल्यू व ल्यूया ल्यू लापित्त सिरपा इनेगु ज्या नं जुल। कक्षा ५ लिं न्हापला:मह छात्रा एञ्जीला विकयात शिक्षक र।जकुमार महर्जन थ: अबु साहिला महर्जनया लुमन्ति पलिस्था यानात:गु सिरपा: १००१ धेवा सिरपा: बियादिल। अथेहे कक्षा ८य न्हापला:मह छात्र मिलन घलानयात हिरावहादुर महर्जन रु.१५०१ तका धेवा सिर पा: बियादिल। अथेहे कक्षा ९ लय न्हापला:मह छात्र चन्द्रवहादुर कुंवरयात थ: मदुम्ह मां शुभद्रा खनालया लुमन्तिइ प्रधानाध्यापक बन्नी खनाल रु.२००५ तका धेवा सिरपा: बियादिल। एसईई परीक्षा दकलय अच: ल्या ह:म्ह निरमाया तामाड ३.६० यात थ: अबु विस्वलाल महर्जनया लुमन्ति वयक:या काय रेणुलाल महर्जन रु. ६५०० तका धेवा सिरपा: बियादिल। अथेहे संजिव बल जीपिए ३.४५ ह:म्ह संजिव बलयात रु.३५०० तका धेवा ल:ल्हाना दिल। न्हापांगु औपचारिक ज्याभव: लिपा विद्यार्थीपित्सं सांस्कृतिक ज्याभव: या:गु ख:।

तपाईंको टोलमा भएका घटना कीर्तिपुरको समाचार बनाउने हो भने तपाईं एक कल फोन गर्नुस् हामी तपाईंको टोलको समाचार कीर्तिपुरको समाचार बनाईदिनेछौं

कीर्तिपुर सन्देश साप्ताहिक



कीर्तिपुरको चित्रण

किपुलिं पिदनाचवंगु कीर्तिपुर सन्देश वा:पौ व ज्वजलपा: वा:पौया ग्राहक जुइगु नितिं स्वापू तयादिसँ

कार्यालय: निखासी टोल: कीर्तिपुर नपा-३
फोन नं.: ४३३३००७, ९८४१४०१०७७

ज्वजलपा वा:पतिइ छिगू चिनाखँ/बाखं/हाइकू विज्ञापन व मेमेगु च्वसू पिथनेगु जूसा जिमित स्वापू तयादिसँ

सकलसिगु मंका: स:



ज्वजलपा वा:पौ

ज्याकू: निखासी त्वा: किपू नपा-३ फोन ल्या: ४३३३००७, ९८०८६२६४२० ई-मेल : kirtipur_sandesh@live.com

साहित्य उपन्यास – जन्ति न्त्यात

च्वमि— मदन गोपाल प्रधान “क्वा:घासा”
कथहं

थुलि धा धां फ्यतुना च्वं थासं दना वना: ग्वार। तुला च्वंम्ह मिसायात कतिकक घयेपुल। अबलय् हे लाक्क खापाय् ध्यारा ध्यारा या:स: दत निम्हं वाथाक्क दना: पलंगयन्तुं फ्यतुत। ध्यारा ध्यारा या:स: भन हे तत: स: जुया वल। खापा हे तज्याइ थें च्वं। निम्हेसियां च्व्वा: गथखेसे च्वन। खापाय् ध्यारा ध्यारा या:स: धा:सा दूगु मखु। भचा जायका: मिजंनं न्त्यस:तल, “अन सु?” लिसलय् छुं स: तायेदुगु मखु सिबाय् व हे खापाया ध्यारा ध्यारा स:।

धाथें खापाला त:हे छ्यात। आ: छु मानि? ग्याना ग्याना पुसे च्वपिं न्याम्ह मनूत दुहाँ वल। अमिगु ल्हा:तिइ थीथीगु ज्याभ:त दु। न्याम्हेसिनं पा:लाक्क भ्वांपुइथें व मिजं व मिसायात ज्वन। व मिजं नं न्त्यनेसं च्वंम्ह छम्हेसित थिक्क:कया: प्यंकल। व मनू चता: वात। जुरुक्क दना वया: व मनू नं व मिजंया प्वाथय् लाक्क भ्वा भ्वां दाल। अले मिखा तत:ग्वय्क कना: लागि मिगि चाया: च्व्वा: ह्याउँक च्याकल। “थ्वैत थन हे हिसाब किताब याना थकेगु जुइ!” धका: मिजंम्हेसित स्वया: व मनूनं धाये धुंका: मिसापाखे स्वया: धाल, “थ्व ला दयानं इलं ला: खतं दयेका: त:म्ह ख:। थ्वैत भीसिनं स्यंके मज्यू। वरु जिगु कोथाय् यंका ति छिपिं निम्हेसिनं आमयात सीस्वां थें याना र्यकि! जिपिं थ्वैगु कर्मकाण्ड सिधयेका वये।”

मिसायात निम्हेसिनं यंकल। स्वम्हेसिनं मिजंम्हेसित ग्वारा ग्वारा चिंक दाल। म्ह छम्हं हिया हि जुइ धुंकलनं व मिजं नं अपिनाप त्वायेगु मत्व:तू। फुसां मफुसां ल्वानान्तुं च्वन। ल्वा ल्वां व मिजं हि ल्हवया सित।

छम्ह ल्याय्म्ह मनू फाङ्गा फिङ्गा पुइका: जूरुक्क दन। वं थ:यात थ:गु हे पलंगय् लुइकल। स्व: स्व: वयाच्वंगु च:ति हुल। ग्यानापुक्क महंगसय् खंगुलिं पलख त्वलय् जुया च्वन। अले ल: छक: त्वना: हानं देन।

नवनित क्वहाँ वल। ल्हा: फुसुलुं व:गु खना: श्री न्यन, “च्या का वनागु मखु ला?”

“ख: मां नं हयादिल। अय्, प्याखंला धायेवं हे क्वचाल! गुलि याकनं सिध:गु?” धाधां नवनित न्हापा फ्यतुना च्वं थायन्तुं फ्यतुत।

टि.भी.या खालय् उदघोषीका मयजुया च्व्वा: लुया वल। मयजुं नवात, “स्वया हे दिल टेलिचित्र “यज्जु व मतिना।”

स्वंगु कप च्या किस्तिइ तया: नवनितया मां दुहाँ वल। “म्हं फुला, काकि?” श्रीं धाल।

“गो, छु धाये? फु धायेला मफु धायेला। मफु धाये धा:सा, थहाँ क्वहाँ जुया च्वनागु हे दु। फु धाये धा:सा नयां तिलेमग्यं।” धाधां नवनितया मामं च्या छगू कप श्रीया न्त्यने तय बिल। नवनितयात छगू विल। अले मेगु कप थ:त: कया: फ्यतुत।

“आ: स्वया दिसं “नुग:या घा:” या निगूगु श्रृंखला। उदघोषीका मयजुया स: टि.भी.या लाउडस्पिकरं थ्वल।

स्वमेसियां मिखा टि.भी. पाखे वन। श्री व नवनितया मिखा टि.भी.या खालय्सा नवनितया मांया मिखा टि.भी.या ग्वलय्। मचायेक उसि धा: पहलं नवनितया मांम्हं खँ छुत, “टि.भी. चायेका: धा:सा खँ ल्हाये हे सुख मदु। स्याना: छव:सां मज्यूला?”

“छाय् स्याये मा:गु? मांया धा:सा

“मखु, मखु, नवनित, टि.भी. स्याना: छव:सा ज्यू। गुलि स्वयेगु? हानं खँ ल्हाये बलय् टि.भी.

चायेका तयां नं छु यायेगु? मखुला, काकि?” नवनितया खँ पूमवं हे श्रीं धाल।

“ख: धया, सुख हे मदु।” काकिं धाल। नवनित रिमोट कन्ट्रोलर तित। टि.भी. सित। रिमोट कन्ट्रोलर थासय् तया: टि.भीया दराज तित। भ्या: धकिं उला छव:त। धकिं उलेवं हे चतमतं धायेक कोथाय् निभालं खल। नवनित थ:गु थासयन्तुं फ्यतुत।

न्त्यने च्वंगु च्या क्यना: “च्या नि त्वं, श्री।” धका: काकिं धासेलि श्री च्या कप ल्हवन। च्या त्वना च्वंम्ह श्री काकिया खँ न्यनेत न्हाय्पं तिंस्वाका नं च्वन।

“गुलिमछि दयेधुंकल वल धा:गु। थौं हे तिति ख्वा: खन।” च्या त्व त्वं काकिं धाल।

“वये धयागु ख:, काकि। लिहे मलाना वये मफत।”

“वला ख:। सर्किसयां थ:थ:गु ज्यां लिमला। अय्सां थय्क ला:खतं सुथय् बहनि न्त्याबलें व:सां ज्यूगु ख:। गवलें मव:निगु न्हगु थाय् मखु थें। म्हमस्यूगु नं मखु। तापागु नं मखु।”

“अय्जुया थौं छिकपिं नापलाये धका: हे वयागु। कका खने मदु। छें मदिइ ला कि?”

“गन थें मस्यू छक: वनावये धका: ज्य:नां याना: पिहाँ भा:गु। वय्क:या नं छु, मन थातय् ला:गु मखु। वय्क:या हे जितियांना: थौं फुक्कसियां चितासू मदयेका: च्वने माल।” भसुका तया: नवनितया मामं धाल।

“मांया धा:सा न्त्याबलें वहे खँ। न्त्याबलें वा नं याना: धका जक धयादि। छिं नं ल। गने ज्यूगु ख:नि। न्हापा धा:सा छिं छुं धया मदिइ। आ: वा नं हे याना: धका: वा:यात पा: ल्याना छु याये? न्हापा ततां म्हा: धका: धा:बलय् छिं नं ला बाया खँय् तेवा बिया दूगु ख:नि। ख:थाय् ज्यूथाय् धैगु न्त्याबलें चूलावैमखु धका: छिं नं ला ततायात क्वातुक्वाना: दूगु ख:निसा। इहिपा: याये मखुनि धका: ततां कर जोरी बित्ति याना: इनाप या: बलय् छिकपिनि न्हाय्पनय् चिकं तया:तल। आ: वया: थये अथे धका: हालां छु याये? न्वाये भनं मांम्हेसित स्वया: नवनितं धाल।

नवनितया खँ न्यना: त्वलय् जुया च्वंम्ह काकिया मिखाय् ख्वि ललमल द्यात। मिखां पिज्वये त्यंगु ख्विं पर्सि च्वथं हु हुं मांम्हं धाल, थये जुइ धका: सुनां स्यू? बिया: छव:या गुलिचां मदुवं थ: म्हयाय्या म्हय बखि वस लाइ धका: जिं गय्याना सिकेगु? दैवं नं जित: हे छाय् लिइ मा:गु?”

काकिया ख्व:गु नुग: नवनितया थ:गु हे धापू अले श्रीया थ:गु हे वेथा स्वम्हेसिया स्वंगु नुग:या थीथी स्वघा:या प्रवाह छगू हे थें च्वक्क पोखराया सेर्ता खुसि न्त्याये थें दुने दने न्त्याना: च्वन, अत्तापत्ता मदयेक।

“पिज:या भा:त क्यान्सर ल्वचं मदुगु हँ, खला काकि?” श्री खँ न्त्यथन।

“ख:। वहे ल्वचं मदुगु, पिज: बिया: छवया लछि हे मदुवं।” ख्वखना सलं काकिं धाल।

“अयागु ल्वय् दुम्ह धका: छिकपिसं गय् मस्यूगु? बिया: छव:ये न्त्य: छु गथे धका: फुकं न्यनेकने याना: हे दूगु खइ।”

“बिया छवया प्यन्हु लिपा खम्पाय् कै छग: व:गु त्वह। क्यना: जाँचे याका: स्व:बलय् हिया क्यान्सर जुल धाल हँ। अलय् लछि हे मदुवं सित धायेके हल।” थुलि धया ससधारा हायेथें ख्वि हायेका पर्सि च्वथं च्व्वा: त्वपुया: काकि हि हि ललं ख्वल। नवनितया मिखाय् नं ख्वि जाया: वल। तर ख्वये मफु। तिकि नने त्यंगु ख्वि हु हुं नवनित छक: उथु उथुं सन। नुग:पाय् ल्हा: तया: बुवुस्यात। कथहं

ने.सं. ११३७ सिल्लागा आमै (२०७३ फागुण १५ गते) ज्यापु महागुथि किपू नगरसमितिया ग्वसालय् जूगु साहित्य गोष्ठी ब्वंगु च्वसुत छसिंकथं थन न्त्यव्वया च्वना।

१.अय् नेवा: ! सकल नेवा: !

ललेन्द्र शाक्य किपू

थौं भीगु नुगलय् घा: याना: इतिइति बैरीत न्हिलाच्वन
थौं भीगु मिखां ख्वि हायेका:
तमासा इमिसं स्वयाच्वन।
छ जि मखु, भी भीपिं जुइनु
ल्वाभ: ल्हवना: भीसं स: थ्वयेकेनु।
अय् नेवा: ! सकल नेवा: !
नेपा:या नितिं भी छप्पं जुइनु॥

मांभाय् हरन् जुल वा: चायेकी अस्तित्व मदइ न्त्यलं चायेकी।
हता: ख्यलय् वनेमाल भी
ही क्वाकी अय् नेवा:
राजनीति मखु नेवा: म्हसीका
बी सयेकी अय् नेवा:।
थौं हे भीपिं छ्भी मजूसा
गनं दइ भीत कन्हय्या भलसा।
अय् नेवा: ! सकल नेवा: !
नेपा:या नितिं भी छप्पं जुइनु॥
मांभाय्या नुगलय् मतिना व्वलकि
न्हून्हूगु स्वां क्यवय् ह्वयेकि।
पूखाया गौरव भी न्त्य:ने
त्यं दनि अय् नेवा:
ग्यायेगु हे छाय्? मूस्या: ज्वं
सकस्यां च्याकि अय् नेवा:।
थौं हे भीसं च्याका: मजूसा
गनं खइ ज: देसभक्तया
अय् नेवा: ! सकल नेवा: !
नेपा:या नितिं भी छप्पं जुइनु॥

२.संकल्प जिगु अले धैर्यता छंगु जुईमा:

प्रशान्त महासागर

जिं
पेट्रोलया पुखु
छिना:
छंथाय् वयाच्वना
जित छं पिया च्वनेफुला ...
खय्तला थ्व जीवन
छंगु नितिं जक छयेला नं मगा:
छन्त नका: जक नं मगा:
अभाव व प्रभावया खँ
जिं थें छं नं ल्हाय् हे मा:
जीवन थ्व
जन्म कया सिइत जक मखु
म्वाय्त ख: धाय् हे मा:
जिं
पेट्रोलया पुखु
मिइया दुंगाया च्वना:
छिना:
छंथाय् वया च्वना
जित छं पिया च्वनेफुला।

३.गन व म्हिग जक मखुला व

इन्द्रमान महर्जन
यें, मैतीदेवी

गन व म्हिग जक मखुला व
हथा: याना राज्य त्याकुगु

म्हिग जक मखुला व
गन भाय् व तजिलजियात
क्वतेला वंगु

छाय् थौं थये ख
छाय् थौं थये जूगु ख:
गन वन व सभ्यता व पहिचान
तना वने त्यंगु सभ्यता
थने भीसं मिलेजुया हाकनं

आ: हे ख: स: थ्वयेकीगु ई
आ: हे ख: छुं याना क्यनेगु ई
गन व पहिचान यात हया
गन व तना वने त्यंगु
इतिहास स्वया


थ्वयेकी स:
थ्वयेकी बाजं
गन व तना वने त्यंगु
इतिहास कया
नेवा: जुया भी नेवा: जुया

गन व माला च्वनागु
नेवा: राज्ययात कया
गन व थ्वयाच्वंगु स: भीसं ब्वया
गन व सर्ग क्वसं स्वया
थ्वयेकी स: हे नेपा:मी हे
दाजु किजा ततापिं
गन व मदया च्वंगु
नेवा: राज्ययात कया
गन व तना वनाच्वंगु
पहिचान यात कया

**छिगू नं चिनाखँ, बाखनिसें छुं
नं कथंया च्वसू दुसा बियादिसँ
जिमिसं ल्व:कंह्वा:गु ज्वजलपा
वा:पतिइ पिकायेगु जुइ ।**

**ज्याकू: निखासी त्वा: किपू नपा-३
फोन ल्या: ४३३३००७,
९८४१४०१०७७
ई-मेल :
kirtipur_sandesh@live.com**

ह्यूपा:



नाति महर्जन

च:चपा:, पाँगा

४६ सालं देशय् राजनीति ह्यूपा: व:थें

जिगु छेयानं अवस्था हिला वन

लोकतन्त्र वया जनतायात दु:ख सिइकात:थें

जिमि काय्‌नं जित दु:ख सिइका च्वन ॥

लोकतन्त्र वसेंनिसें देशय् मनपरि जूथें

काय्‌नं जिगु छें मनपरि यानाच्वन

लोकतन्त्र वसेंनिसें खुलाय् छक:

प्रधानमन्त्रि हिला मोज या:थें

काय्‌नं कला हिला: हिला: हया मोज यानाच्वन ॥

नेतातय्त कानुनं छुं याये मफुथें

जिनं काय्‌यात छु याये मफयाच्वन

नेतातय्त कारवाहि याइपिं हाकिम जागिरं पितना छ्व:थें

जिमि काय्‌नं जित छें पितनेगु स्वयाच्वन ॥

भ्रष्ट नेतां याना देश थाहाँ वयेमफुथें

कपुत काय्‌नं याना जिगु छें थकाय् मफया वन

नेतातय्सं देश न्ह्यय्गु टुक्रा या:थें

जिगु छें बूँ नं भौपिन्सं टुक्रा टुक्रा याये त्यन ॥

नेतातसैं न्ह्यलाम्हेसित प्रधानमन्त्री या:थें

काय्‌नं न्ह्य:नेलाम्हेसित कला धका: धुकू ल:ल्हाना च्वन

प्रधानमन्त्री जुया देशया धुकू खालि यानां च्वथें

भौमचा जुव:पिन्सं जिगु धुकू खालि याना वन ॥

नेतातसैं देशया सम्पति फुकुथें

काय्‌नं जिगु सम्पति फुका च्वन

नेतातसैं न्हय्गु पुस्ता जक प्वचिना च्वथें

भौपिन्संनं थ:तमाक्क प्वचिना ज्वना वन ॥

जनतां त्य:पिं प्रधानमन्त्री न्यादैं मपूथें

खुला हे मपू काय्‌नं ल्ययाहइपिं भम्चा नं

नेतात थ:थ: हे ल्यया प्रधानमन्त्री जुईथें

काय्‌नं थ:हे ल्यया हय्सल आ: भम्चात नं ॥

देशया सम्पति नेतातसैं मोज याना च्वथें

जिगु सम्पति काय्‌नं मोज यानाच्वन

लिपा यागु छुं विचा: मयासे इमिसं देश लिलाम याय् त्यथें

काय्‌नं जिगु छें लिलामय् मिई त्यन ॥

छिमेकी राष्ट्र धा:थें नेतात प्याखें हुया च्वथें

लमि धा:धा:थे काय् प्याखें हुयाच्वन

प्रधानमन्त्री जुई त्यलकि नेता विदेशीया चाकरी वनीथें

कला हिले त्यलकि वनि लमिया चाकरि जिमि काय्‌नं ॥

बांला:पिं धका: भोट बिया त्याका छवयापिन्सं

थौं देशय् मितय्गु स्वयाच्वन

जांदुम्ह धका: मुलय् म्हितका तयाम्ह काय्‌नं

म्वा: म्वा: हे जित मितया च्वन ॥

न्ह्यागु ज्यानं च्वय्‌च्वपिन्सं या:थे सय्की धा:गु

धाथें आ:ला जित ख:थें हे च्वन

थौकन्हय्यापिं नेतातय्गु बानि व्यवहार स्वया स्वया

वांमला:गु लैय् पला: तय् सय्कल जिमि काय्‌नं नं ॥

ज्ञानी गुनी तयगु संगत त्वता काय्‌नं

नेतातय्गु संगत या: वन

भ्रष्ट नेतातय्गु संगतय् लाना थौं जिकाय्

स्व स्वं हे पथभ्रष्ट जुया वन ॥

मचावलय् गुलि ज्ञा: दुम्ह काय्‌नं

थौं जित नांगां याये त्यन

नेतां देशया उद्योग दक्को मिया: न:थें

काय्‌नं जिगु दक्व छें बूँ मिई त्यन ॥

कपुत काय्‌नं जिगु सर्वश्व फुका

जित फोगिं याय् त्यन

भ्रष्ट नेतातसैं नेपा:या जनता

लू लू ख्वयका पितना छ्वय् त्यन ॥

थौकन्हैया नेतात व जिमि काय

छुं भचा हे मपा: थें च्वं

थौकन्हैया नेता स्थीर सरकार मदय्‌कुसे देय् स्यका: च्वथें

काय्‌नं दच्छि मपूपिं भम्चा हया छें स्यंका: च्वन ॥

राशी कथं ल्वय्या बारे

जोतिष सफू पितव्वज्या

ज्वजलपा वा:पौ

नेपाल ज्योतिष परिषद् उपत्यका समितिपाखें ग्वसा:ग्व:गु ज्योतिष डाक्टर बिरेन्द्र प्रसाद काय्‌ष्ठं च्वयादिगु ज्योतिष व रोग नांया सफू पितव्वज्या या:गु दु ।

खपय् जूगु उगु सफू पितव्वज्या समारोहया मू पाहाँकथं सांसद नारायण मान बिजुक्छें यानादिगु ख: । उगु सफूतिइ थीथी राशिकथं गुगु ल्वचं याकन कइगु व उकिया लिच्व: गुकथं लाइगु व उकिया समाधान यायेत गुकथं ज्योतिष शास्त्र छ्यलीगु धैगु बारे च्वयात:गु धका: ग्वसा: खलकं जानकारी ब्यूगु दु ।

न:बहा:या देगु छें पुन: निर्माण

ज्वजलपा वा:पौ

यलया यशोधर महाविहार बुवाहा:या न:बहा:या देगुद्य: छेंया पुन: निर्माण ज्या क्वचा:गु दु । अथे देगुद्य: छें पुन: निर्माण ज्या क्वचा:गु लसताय् शुक्रवा: छ्गू ज्याभ्‌व: जुल । यशोधर महाविहार विहार सुधार समितिया ग्वसालय् उगु कथंया ज्याभ्‌व: जूगु ख: । मूपाहां बुवाहा यशोधर महाविहारया चक्रेश्वर आजु आशाकाजि बज्राचार्य जुयादीगु ख: । उगु ज्याभ्‌व:या सभा नाय: ललितपुर विकासया नितिं समाजया नाय: नापं पुलांम्ह मन्त्री बुद्धिराज बज्राचार्य जुयादीगु ख: । उगु समाजया कुतलं भारतीय दुतावासया आर्थिक ग्वाहालि नापं स्थानीयवासीया नं आर्थिक ग्वाहालिपाखें देगुद्य: छें दयेकेगु ज्या क्वचा:गु ख: । ज्याभ्‌वलय् भारतीय दुतावासया प्रतिनिधि कथं सुजाता किशोर पाहां कथं सहभागी जुयादीगु ख: । ज्याभ्‌वलय् पुन: निर्माण कमिटीपाखें यशोधर महाविहार सुधार समितियात देगु द्य: छेंया ता:चा: ल:ल्हा:गु ख: । उगु हे कथं देगु द्य:छें पुन: निर्माणया नितिं विशेष ग्वाहालि यानादीपिं सकलसित दसिपौ बिया हनेज्या या:गु ख: । आर्थिक ग्वाहालि या:पिन्त नं दसिपौ बिया हनेज्या या:गु ख: । उगु हे कथं यल महानगर पालिकाया वडा नम्बर २० व १७ या वडा अध्यक्षपिन्त नं भित्तुंता विउगु ख: ।

न्हापांखुसि मिसेस नेवा: रेजीना

ज्वजलपा वा:पौ

के टि एम एण्ड ईभेन्ट्सया ग्वसालय् नेपालभाषा ख्यलय् दकले न्हापांगु ज्याभ्‌व:कथं मिसेस नेवा:ज्याभ्‌व:शुक्रवा राष्ट्रिय नाचघरय क्वचा:गु दु । ईहिपा जुईधुकुपि मय्‌जुपिनिगु दथुई बांला:म्ह मय्‌जु कथं ल्ययेगु उगु धेधेंबल्ला कासाय् मुक्कं भिन्पेम्ह मय्‌जुपिन्सं ब्वति का:गु ख: । उगु धेधेंबल्ला ज्याभ्‌वलय् मिसेस नेवा: रेजीना शाक्य न्हापा लागु दु सा ग्रीष्मा तुलाधर ल्युला:गु ख: अथेहे लिया ल्यू सरिता नेम्कुल प्रधान जुयादिगु ख: । वय्‌कपिन्त मू पाँहाकथं भायादिम्ह ख्यालि जुजु मदनकृष्ण श्रेष्ठ दसी पौ ल:ल्हाना हनादिगु ख: । उगु ज्याभ्‌व:या निर्णायक मण्डलय् प्रेमलाल मर्हजन, दिपक तुलाधर, डा चुण्डा बज्राचार्य, प्रदिप खड्गी व दर्शनवीर शाक्यपिं च्वनादिगु ख: । धेधेंबल्लाखय् नेपालभाषायात तिव:बिगु नापं भौमस्त जुईधुंका नं समाजय् सक्रीय जुईफईगु सन्देश लिसें नारी प्रकृति जुगु व मानवीय तालिम दत धा:सा क्वा:तुक नापं सक्रीय जुया छेंज व समाजया विकासय् न्ह्या:वनेफईगु ग्वासाखलकं धा:गु दु ।

किपू नगरया फुक्क वडाय् योग शिविर संचालन याइगु वइगु साउन १५ निसैं पांगाया दहनय् संचालन जुइगु

ज्वजलपा वा:पौ

योग साधना समाज व जीवन विज्ञान कीर्तिपुर केन्द्रया मंका: कथं न्ह्यानान्चवंगु योग विज्ञान शिविर संचालन जूगु लच्छि क्यंगु लसतय् छ्गू ज्याभ्‌व: जुल । शिविरया संयोजक ज्ञानबहादुर महर्जनं न्ह्याकादीगु उगु ज्याभ्‌वलय् योग साधान समाजया अध्यक्ष रामकृष्ण महर्जन, प्रशिक्षक कान्छाभाई महर्जन, जीवन विज्ञानया प्रशिक्षकपिं किरण कुमार बज्राचार्य व ज्ञानकेशवरी महर्जनपिन्सं सामुदायीक भवन क्वा:क्यबय् नियमित योग अभ्यास न्ह्याकुसें उगु हे शिविरय् ब्वति कयादीपनिगु दथुइ लच्छियंकं योग, ध्यान, प्राणायाम आदियाना थ:गु जीवनय् गज्ज:गु अनुभव जुल धइगु बारे कनादिल । नापं वय्‌क:पिन्सं संस्थायात मा:गु कथंया सल्लाह नं बियादिल ।

उगु ज्याभ्‌वलय् गुतपौया गायत्री महर्जन, कुसिचाया विमला महर्जन, त:ननिया गंगा महर्जन, तुंभ्‌व:या राजमान महर्जन, चिलंच्वया जयन्ती बज्राचार्य, म्वानत्व:या रति महर्जन, माताख्य:या विना श्रेष्ठ थ:थ:गु अनुभवया खँ कनादीगु ख: । नापं यशोधरा श्रेष्ठं प्रशिक्षार्थीपिंपाखें मुना व:गु ध्यबाया ल्या:चा: कनादिल । कीर्तिपुर नगरपालिका दुने शारिरिक, मानसिक नापं चेतनाया वृद्धि यायेगु व सकारात्मक सोचया विकास यायेत मदयेकं मगा:गु योग, ध्यान, प्राणायामया माध्यमलिसें इलय् ब्यलय् अनुभवी गुरुपिंपाखें प्रवचन ज्याभ्‌व: याना किपू नगरयात योगमय यायेगु व दच्छिा दुने फुक्क वडाय् छ्गू छ्गू योग शिविर संचालन यायेगु मू आज्ञु तयात:गु दु ।

थ्व हे भ्‌वलय् कीर्तिपुर नगरपालिका वडा नं. ५ पांगाया दहनय् च्वंगु सामुदायीक भवनय् थ्व हे वइगु साउन १५ गतेनिसैं

सुर्वासिया ५ वजेनिसे ६:३० तक योग शिविर संचालन यायेगु निर्णय या:गु दु । जीवन विज्ञान कीर्तिपुर व योग साधान समाजया प्रशिक्षकपिं नापं सरोकारवालापिं नापं त्वा:या खल: पुच: व मिसा पुच:या मंका: मुँज्या च्वना अथे पांगाया दहनय् शिविर संचालन यायेगु निर्णय या:गु ख: । उगु शिविरया नितिं कजि रवि महर्जनयात ल्य:गु दु ।

उगु लागायान्यय्‌दैं क्वय्यापिन्त विशेष प्राथमिकताबिसें उगु शिविरय् ब्वति कायेत इनाप या:गु दु । किपू नगरपालिकाय् योग साधना समाजपाखें गान्धी भवन त्रिवि दुने भिदैं न्ह्य:निसैं संचालन जुयाच्वंगु दुसा अथे हे जीवन विज्ञान कीर्तिपुर केन्द्रपाखें कीर्तिपुर नगरपालिका वडा नं. ९ या कीर्ति सेकेण्डरी स्कूलय् दत्या न्ह्य:निसैं शिविर संचालन याना वयाच्वंगु दु । उगु हे कथं वडा नं ३ या कुतिसा: त्वालय् श्री पंचमि मानन्धर गुथिया संयोजनय् वंगु फागुन महिनानिसैं योग शिविर संचालन यानाच्वंगु दु । उगु हे कथं वडा नं. १० सामुदायीक भवन क्वा: क्यबय् लच्छि न्ह्यवनिसें शिविर संचालन जुया वयाच्वंगु दु ।

थ्व हे भ्‌वलय योग शिविर संचालन यानाच्वंगु संस्थात जीवन विज्ञान नगां, जीवन विज्ञान कुतिसा: त्वा:, योग विज्ञान शिविर सामुदायीक भवन क्वा:क्यबया मंका: ग्वसालय् किपूया ऐतिहासिक नापं पुरातात्विक सांस्कृतिक सम्पदा चिलंच्व विहारय् गुंला धर्मया मेलायात ध्यानय् तया शविना: चिलंच्व द्य:या ज:ख: सर सफाई या:गु दु । उगु सर सफाई अभियानय् शिविरय् संलग्न जुयाच्वपिं थीथी त्वा:यापिं मनूत सहभागीता दुगु ख: । सर सफाई अभियानय् थ्यंमथ्यं निस:म्ह मनूत दुथ्या:गु ग्वसा: खलकं धा:गु दु ।